

“Un Anochi Literario” tabata masha bunita y emocional

STA. CRUZ -- Diabierna 8 di December pa 8 or anochi a tuma lugar “Un Anochi Literario” den Fort Zoutman na Oranjestad.

E anochi a ensera declamacion, musica, baile y canto y tambe a “reviva” algun escena di e famoso obra di Sra. Nydia Ecury: “Luna di Papel”, manera entre otro, e conocido “Who the tata be!

E actividad cultural aki, tabata den cuadro di e prome lustro di Fundacion FUNDARTE, Fundacion Arubano di Arte.

Durante e anochi tabata tin presentacion di bailarina Alidia Wever, declamacion cu Rosabelle Illes, Mayra Lopez y Ruthy Vrieswijk, canto di Coro Melange cu Maybelline Arends-Croes, musica di harpa cu Edgar Kelkboom y cuarista Doodle Sophia, actuacion di nos streya Farita Luidens compaña pa e pianista Fred Dirksz, e maestra Diana Antonette cu su Skol di Danza y e gran personahe sra. Nydia Ecury.

E anochi den e bunita patio di Fort Zoutman, a promete di ta uno hopi agradabel pa henter famia. Tambe tabata tin reconocimiento di tres baluarte di Cultura cu e “Premio Fundarte” kendenan ta:

---NYDIA ECURY---

E curiculo di Nydia ta inmenso pa e actividadnan riba tereno di actuacion, filmacion, como actriz y directora di obranan, traductora, mundo literario cu publicacion di 6 buki y varios den papiamento y ingles. Premionan el a gana hopi den su carera artistico y tambe como Actriz di Aña, mihor comercial di television, ganador di Chapi di Plata, premio como actriz den diferente festival internacional di teatro y asina por sigui menciona e lista largo di premiacion y e decenas di biaha cu ela presenta durante festivalnan literario y teatral.

--- ALCIDES “CHIDO” QUILOTTE---

Alcides “Chido” Quilotte ta ser considera como un icono den mundo di teatro na Aruba. E ta un di e actornan mas grandi cu nos isla a conoce, y ademas di esaki a dirigi varios obra, ta traductor y autor di obranan teatral y ganador di varios premio internacional riba tereno di teatro como director y actor.

Su trayectoria riba tereno teatral na Aruba ta inmenso, pero debi na quebrante di salud e no ta mucho activo mas.

---- BURNY EVERY----

Na luna di Augustus e aña aki, Aruba a perde un gran dama di teatro, sra. Burny Every. Un maestra y profesional, no solamente como directora y actriz formidable, pero tambe como autor di obranan teatral, traductor di obranan di fama, y tambe conoci pa su obranan literal, riba tereno di poesia. Su obranan a ser publica den varios revista y den varios idioma. Burny Every a dedica su bida na teatro y educa nos hobennan tanto na Academia Pedagogico/ IPA y na Colegio Arubano. El a participa den varios filmacion y a actua cu artistanan cu awe ta famoso, entre otro Rutger Hauer cu tabata su compañero di estudio. El a dirigi filmacion di e prome pelicula arubano, “Dera Gai” di Dennis Henriquez y colabora den “Duel in de Diepte”.

Hopi cara conoci di teatro tabata presente, pa asina rindi homenahe na e valuartenan, kendenan ta hendenan cu merece di ta entre e grandinan di teatro di Aruba y Caribe. Un palabra di felicitacion ta bay na Fundarte, bao di liderazgo di Leo Tromp y henter su comitiva, cu nan “Anochi Literario.”

